

QAMBAR OTA

TOSHPOLVON  
VA  
ISHPOLVON  
HAQIDA ERTAK

ERTAK-DOSTONLAR, SHE'RLAR

TOSHKENT "MA'NAVIYAT" 2001

Qambar Otaning "Ota"ligidan ko'ra bolaligi bolalarga yaqinroq. Chunki ko'nglidagi barcha she'riy tizmalari beg'ubor bolalikning halinchaklarida pishib yetilgan. Shu bois uning she'rlari ko'ngilga tez o'tiradi. Xotirada uzoq saqlanadi. Bolalarning tasavvur olamini yanada kengaytiradi. Kattalarning unutilgan bolaligini yodga soladi. Bir lahza turmush tashvishlarini unutib, she'riyat ummoniga g'arq bo'ling, ruhiyatingizni quvvatlantiring.

Q 18

**Qambar Ota.** (Qambar O'tayev).

Toshpolvon va Ishpolvon haqida ertak: Ertak-dostonlar, she'rlar.—T.: "Ma'naviyat", 2001.—80 b.

O'z 2

Q  $\frac{4702620204 - 44}{M25(04) - 01}$  42 - 01

© "Ma'naviyat", 2001



## **ERTAKSEVAR QUVNOQ BOLA**

Qiziqtirar afsona.  
Botir bo'lib rasmona,  
Men ertaklar tog'iga  
Yo'l olaman gohida.  
Seskanmayman g'orlardan,  
Cho'chimayman jarlardan.  
Chiqib qolsa yalmog'iz,  
Salom, deyman bir og'iz...  
Duch kelsa ham ajdaho  
Qilolmaydi hech vaqo.  
Boshlab qolsa agar jang,  
Uning holi bo'lar tang.  
Uchib kelsa ko'kda dev,  
Meni bosmas hech qo'rquv.  
Sakrab minib bo'yniga,  
Qo'l solaman qo'yniga.  
Qo'ltig'ini qashlayman,  
Uni yo'lga boshlayman.  
Hiyla qilsa jin, shayton,  
Qotmayman hech lol-hayron.  
Bo'lmay sarson, ovora,  
Tez topaman zo'r chora.  
Demang yana maqtanish —  
Ular menga ko'p tanish.  
Bekorlarga kurashib,  
Yurmayman hech adashib.  
Chin do'stlikni, ham haqni,  
Dunyoda tinchlik, baxtni

Qilish doim himoya,  
Hayotimda zo'r g'oya.  
Rahmat ezgu ertakka,  
O'qimadim ermakka.  
Yovuz devmi, pahlavon  
Duch kelganda har zamon,  
Ko'ksim kerib derman men,  
Hech yengilmas sherman men!

### **BOLALIKNI XOTIRLAB**

*O'imish doim shirin.*

*Pushkin.*

Bobolar nolishiga  
Qo'shilar goh otalar:  
"Hayronman, bu bolalar  
Lapashang, lanj-atala.  
Charaqlamas yulduzday.  
Tovonidan o't chaqnab,  
Qoyillatmas mehnatni.  
Yolchimas hatto maktab.  
Zavqi yo'q, behafsala,  
Chalajon, esnoq bosib,  
O'g'lon degan zo'r nomga  
Bo'lib yurmas munosib.  
Uy yonidan jilolmas,  
Ivirsiq, emas chaqqon.  
Vaqtни bekor o'tkazib,  
G'aflat loyiga botgan"...

Otalaru bobolar  
Bolaligin xotirlab,  
Yuragidan avaylab  
Gapiradi qadrlab.

U davrga qiyoslab  
Bo'lmas bizning zamonni.  
Masalaning bor chigal,  
Yechib bo'lmas tomoni.  
Qiynalishgan... ishlashgan  
Ular dala qo'ynida.  
Vatan, xalqning taqdiri  
Bo'lgani rost bo'ynida.  
Bizning esa bu kunlar  
Tordir yurgan ko'chamiz.  
Televizor ko'rishdan  
Ortmas kunduz-kechamiz.  
O'ylab ko'ring, topilmas  
To'p tepishga keng maydon.  
Ov qilmaymiz to'qaydan,  
Baliq tutmaymiz soydan.  
Tomlar usti tunuka —  
Ochilmaydi qizg'aldoq.  
Chiqib olib balandga  
Uchirib bo'lmas varrak.  
Tutcharvoqqa kirvolib  
Shoxlarini silkitib,  
Tutga to'yib, qushlarni  
Yursang haydab, hurkitib.  
Qizil naqshin olmalar  
Qayga ketdi, attang-a?  
Sho'xlik qilib bir juftin  
Tiqib olsang lippangga.  
O'rikzorni oralab  
Ukachangni yetaklab,  
Tersang nurga yo'g'rilgan  
Zardolini etaklab.  
Jildiragan ariqqa  
Mevalarni bir chayib,

Tol tagida o'tirib  
Yesang rohat, ajoyib.  
Bolaligi haqida  
Ota-bobolar yonib  
So'zlaganin eshitsak  
Qo'yamiz bir tamshanib.  
Bog'u chorva mo'l bo'lsa,  
Yurmas edik zerikib.  
Paytida mehnat qilib,  
Dam olardik tiniqib.

**MASHHUR TOSHPOLVON VA UNING DO'STI  
TANBAL OSHPOLVONNING ISHPOLVON  
BO'LGANI HAQIDA ERTAK**

Qadim-qadim zamonda,  
Quyosh kulgan tomonda,  
Darvozasi lang ochiq,  
Mehri olamga sochiq,  
Yonma-yon xonadonda  
Taralibdi sho'x xanda.  
Tug'ilib ikki o'g'lon,  
Dillarni etib xandon,  
O'sishibdi kun sayin.  
Kelajagini tayin  
Etmoqqa ota-ona,  
Kirishibdi mardona.  
Har ikkisin xohishin,  
Bajarishib yoz-qishin  
Ko'ngillarni etib shod,  
Ko'rishar ekan hayot.

\* \* \*

Yetganida besh yoshga,  
Xayolin berib toshga,

Biri toqqa bog'lanib,  
Mashq qilishga chog'lanib.  
Qayroqni otib o'ynab,  
Toliqib jonin qiynab,  
O'tkazibdi oy-yilni,  
To'q qilib dil, ko'ngilni,  
Tog' havosin simirib,  
Bulog'ida cho'milib,  
Maysalarida yayrab,  
Quvonchdan qalbi sayrab,  
Tanida toshib quvvat,  
Olib ilohiy qudrat,  
Pahlavon yigit bo'lib,  
Yetilmish baxti kulib.

★ ★ ★

Ikkinchisi-chi mehrin,  
Qo'yibdi butun zehnin  
Lazzatli ovqat-oshga.  
Yetganida o'n yoshga,  
Ichib o'n kosa go'ja,  
Yeb har kun o'nta jo'ja,  
Eng sevgan mashg'uloti —  
Ekan uning ovqati.

★ ★ ★

Faqat xayol qilarkan  
Va xudodan tilarkan:  
Hayotda namma narsa,  
Tekinu arzon bo'lsa,  
Kattaroq qozon bo'lsa.  
Cho'michi korson bo'lsa.  
Qoshig'i omon bo'lsa.  
Tovog'i — tog'oraday,  
La'lilsi — nog'oraday.

Piyola —shokosaday...  
Xizmatida bo'lsa shay.  
Barcha ovqat, idishi,  
Barcha ichmish, yemishi  
Ko'p bo'lsa, katta bo'lsa,  
To'yib yeb, rohat qilsa...

\* \* \*

Qo'shni bola qadrdon,  
Bir-biriga mehribon,  
Sal ko'rishmasa agar,  
Bir-birini sog'inar.

\* \* \*

Topgan hunar-izzati,  
Xulqi, odob, xislati,  
Elga qilgan xizmati —  
Yosh umrining hurmati.  
Yurtdoshlarni etib rom,  
Qo'ymish ikkisiga nom.

\* \* \*

Tog'lar toshin ko'targan,  
Mag'rur boshin ko'targan  
Vatanparvar mard o'g'lon  
Atalibdi Toshpolvon.

\* \* \*

Qaydaki ko'rganda osh,  
Ko'tarmagan aslo bosh,  
Lo'ppi, sodda quvnoqni,  
Ovqatsevar do'mboqni,  
Hazillashib har qachon,  
Atamishlar Oshpolvon.



Ikki tengdosh, ikki do'st,  
Biri mag'iz, biri po'st,  
Qalbi ochiq, sho'x, sodda  
Bo'lib o'smish hayotda.  
Ikkisiga har qachon,  
Uchragan yaxshi-yomon  
Odamlarga chin dildan,  
Toza, ochiq ko'ngildan  
Qilib do'stlik hurmatin,  
Hayotdagi xislatin.  
Gapiradi oshirib.  
Kamchiligin yashirib...  
Qadrlashar bir-birin  
Ichda saqlamay sirin,  
Hazil-huzul qilishib,  
O'sar yayrab, kulishib.



Ikki tengdosh — ikki do'st,  
Tartib bilan ustma-ust  
Ayamay vaqt-fursatin,  
Yoqtirgan mashg'ulotin  
Sevib, ettirar davom.  
Qalbiga to'lib ilhom,  
Yashnagan bog'day bo'lib,  
Qomati tog'day bo'lib.  
Cho'qqiday bo'rtib boshi,  
Yelkalar — xarsang toshi.  
Qo'llari — tosh yarog'day,  
Mushaklari qayroqday.  
Devsifatli pahlavon  
Bo'lib o'smish Toshpolvon.

★ ★ ★

Qancha ovqat bo'lsa ham,  
Zarracha olmasdan dam  
Yeb tugatish mashqini  
Mustahkamlar har kuni.  
Xom semirgan savlati —  
Faqat yolg'iz davlati.  
Bilaklari sapchaday,  
Qorni misli qopchaday.  
Birov desa Meshpolvon,  
Birovlar der Oshpolvon.

★ ★ ★

Payti kelib juft tengdosh  
Sirlashib qurmish kengash.  
Sinash uchun taqdirin,  
Ko'rib safar tadbirin,  
Dildan berib qo'lga qo'l,  
Hayo hayt, deb olmish yo'l.

★ ★ ★

Dong taratgan Toshpolvon,  
Unga hamroh Oshpolvon  
Cho'l, biyobon, tog' osha  
Ko'rsatar zo'r tomosha.  
Talab qilingan zamon,  
Toshlarni botmon-botmon,  
Qo'lsiz, kurak tishida,  
Hayrat qo'zg'ab kishida,  
Elu xalqni qilib lol,  
Ko'taradi bermalol.

★ ★ ★

Tegirmonning toshiday,  
Begemotning boshiday

Xarsangni "tap-tap" qilib:  
Misoli koptok qilib,  
Zavqi qaynab dilida,  
O'ynatadi qo'lida.

\* \* \*

Toshpolvonga tasanno,  
Kuch-qudrati mardona.  
Zarur bo'lgan chog'ida,  
Mehr toshib yuragida,  
Qalqon qilib ko'ksini,  
Xalqin tog'day yukini,  
Xizmatidan baxtiyor,  
Dast ko'tarishga tayyor!

\* \* \*

Ish deganda bo'shashgan,  
Labiga uchuq toshgan.  
Osh deganda talashgan,  
Nafsig'a o't qalashgan,  
Topilganida imkon,  
Ishtahasi naq o'p'qon,  
Yolg'iz o'zi biron kent  
Ovqatini ketma-ket  
Sovurib kun, oy sayin,  
Yeb tugatishi tayin...

\* \* \*

Qo'zg'olib or-nomusi,  
Baxtga burilib yuzi,  
Oshpolvon o'z hayotin  
O'ylab, izlar omadin.  
Toshpolvonga havasi,  
Yuragida ixlosi

Ortib borar kun osha.  
Ko'rsatib zo'r tomosha,  
Mashhur bo'lib ketsam deb,  
Elga xizmat etsam deb,  
Belga bog'lab sochig'in,  
Qo'lda o'ynab qoshig'in,  
Tog'orayu tovog'in  
Piyolayu choynagin  
Bosh ustiga qo'ndirib,  
O'yin tushar do'ndirib.  
Nor tuyaday lo'killab,  
Qorni go'yo selkillab,  
Son, bilagi so'lqillab,  
Tanda eti bilqillab.  
Ko'pni etib lol-hayron,  
Raqsga tushar Oshpolvon.

★ ★ ★

Egilsa ham, qotsa ham,  
Qorni bilan yotsa ham,  
Bo'ynin likillatsa ham,  
Urib, taqillatsa ham,  
Tanida borday go'yo  
Tortuvchi ohanrabo.

★ ★ ★

Bor buyumlar shu zamon,  
Siljir manglayi tomon.  
Lopillab mayin-mayin,  
Raqsga tushgani sayin,  
Yelkada patnis, choynak,  
Piyola, kosa, tovoq  
Sekin o'rmalay boshlar.  
Tanda yo'rg'alay boshlar.

O'ziga o'zi go'yo  
Bo'lib dilda mahliyo,  
Zavqi oshgandan oshib,  
Raqs chindan yarashib,  
Ushalganday armoni,  
Aylanadi davrani.

\* \* \*

Katta-kichik zavqlanib,  
Tomoshadan xo'p qonib,  
Tasannoyu rahmat der,  
Kulsin baxtu omad der,  
Aslo kelma bo'sh, polvon,  
Hunar polvon, ishpolvon.

### VATAN SOG'INCHI

Qattol tuzum vayron bo'lib,  
Ozod zamon kelgach kulib,  
Yayrar olam.  
Qutilganday yong'in-o'tdan,  
Kelib qoldi xorij yurt  
Katta bobom.

Umrimda hech ko'rmagandim,  
Aslo suhbat qurmagandim.  
Bo'ldim hayron.  
Ko'zlariga boqib turdim,  
Quchog'iga o'zni urdim,  
Misli jayron.

Hammamizni taniganday.  
Tanlariga joylab jonday,  
Suyub quchdi.  
Istiqlolning in'omini,

Armon, sog'inch visolini  
To'yib ichdi.

Uyga odam sig'may ketdi.  
Jon-jigari yig'lay ketdi  
Quvongandan.  
Og'ajoni yitib ketgan,  
Alam, sog'inch o'tib ketgan  
Edi jondan.

Qon-qarindosh yig'ilishdi.  
Qalblar yonib termulishdi,  
Mehr qo'yib.  
Tuni bo'yi gaplashdilar,  
Dil to'kishib dardlashdilar,  
Yonib suyub.

Bizlar kirib-chiqib turdik.  
Ko'p ma'nolar uqib turdik  
Ko'zlaridan.  
Eshitganda asirlandik.  
Chin yurakdan ta'sirlandik  
So'zlaridan.

Baxtdan yorilguday olam.  
Erta tongda shodu xurram,  
To'y boshladik.  
Avjga chiqdi qo'shiq, o'yin.  
Sharafiga diydor to'yin,  
Kuy boshladik.

To'ydan keyin izzat-hurmat,  
Davom etdi gurung, suhbat  
Sidqidildan.  
Gapirilgan har bir gapning,

Asl mag'zi edi dardning  
Vatan, eldan...

Naq chilaga tushgan kabi,  
Hafta-oylab zada qalbi  
Yonib giryon.  
Musofirlik og'riqlarin,  
Yo'qotgani sog'liqlarin  
Qildi bayon.

Darichayu eshiklarga,  
Eski-yangi beshiklarga  
Yuzin qo'yib,  
Botib uzoq xayollarga,  
Erishgani visollarga  
Boqdi to'yib.

Paxsa devor kesaklarin,  
Xonalar naqsh bezaklarin,  
Dilda xumor,  
Tandirlarning girdlarini  
Ostonalar gardlarini  
Aylab tumor.

Har qatrasini mo'miyoday,  
Har zarrasini to'tiyoday  
Ona yurti.  
Hatto kuzgi xazonlarni,  
Uchib yurgan mezonlarni  
Ko'zga surtdi.

Shaydo bo'lib kunduzlarga.  
Tunda boqdi yulduzlarga —  
Samovotga.  
Tikib butun hayotini,

Jam ayladi niyatini  
Tilovatga.

O'zbekiston — Vataniga,  
Yurakdagi jahoniga  
Kamol tilab.  
Xalqin o'g'il-qizlariga,  
Mangu yorug' yuzlariga  
Jamol tilab.

Ey, Allohim, hech mo'minga,  
Solib nogoh qora kunga,  
Berma ozor.  
O'lmakni ham qilib dushvor,  
Aylamagin dushmanga xor,  
Do'stlarga zor.

Tilagim, shu, yot tuproqda,  
Qoldirmagin g'am, firoqda,  
Ado qilma.  
Ayirsang ham tan-jonidan,  
Hech bandani Vatanidan  
Judo qilma.

### **YOLG'ONGA HECH YO'L BERMANG!**

Qora surkab dillarga  
Ko'chib turli tillarga,  
Yolg'on kelar uzoqdan,  
Bo'shatmaydi tuzoqdan.  
Kim duch kelsa yolg'onga,  
O't qalashar badanga.  
Bu qandayin jin zamon,  
Qachon kelar chin zamon,  
Deb jondan to'yib ketar,

Ich-ichdan kuyib ketar.  
Jahon aro haqiqat  
Kulsin desangiz faqat,  
Pismiq, beyuz, beshafqat —  
Og‘u solmasin tuhmat.  
Adashmasin soddalar,  
Ko‘paymasin xatolar.  
Soxtalikka yo‘l bermang.  
Salom bersa,  
Qo‘l bermang!  
Yuzlarni qilmay somon,  
Bo‘ling unga beomon!  
Yolg‘on umr ko‘rmasin,  
Yosh yurakka kirmasin,  
Yolg‘on aytsa bolalar,  
Yolg‘on ketar bolalab.

### **UCHTA EMAS DEMADINGMI?**

Halim der, og‘zing ochib,  
Nega buncha qaraysan.  
Taniy olmay qoldingmi,  
Bu menman-ku,  
Qalaysan?  
O‘zini o‘nglab olib,  
Gapga kirishar Mahkam:  
Ikkiyuzlamachi deb,  
Sizdan ranjidi akam.  
Hazillashib der Halim,  
Qiziq akangning o‘zi.  
Demadingmi:  
          hech kimning  
Uchta emas-ku yuzi.

## TOSHOTAR

Vagonlarga  
Tosh otgan,  
Begunohni  
Qaqshatgan.  
O'xshar, ayting,  
U kimga,  
Ayiqmi yo  
Maymunga?  
Avtolarga  
Tosh otgan,  
Yuraklari  
Sang qotgan,  
Ayting, qanday  
G'alamis,  
Bormi unda  
Sal nomus?!  
Pistirmada  
Pisinib,  
Yelkalari  
Qisinib,  
Har sharpadan  
Cho'chigan,  
Har lahzada  
Cho'chigan.  
Yo'lovchiga  
Tosh otib,

Bag'ri qolgan  
Tosh qotib.  
Xalqqa mehri  
Yo'qolgan,  
Dili churkab,  
O't olgan...  
Qarg'ishlarga  
Kelib duch,  
Tanasidan  
Qochib kuch,  
Qo'ldan uchib  
Bir toshi,  
Zirqiraydi  
Yosh boshi...  
Kimki inson  
Zotiga,  
Xavf solib  
Hayotiga,  
Bo'lsa ayanch,  
Toshbag'ir.  
Bu gunohi  
Ko'p og'ir.  
Kim tosh otsa  
Xalqiga,  
Tosh otar o'z  
Baxtiga.

## RAHMIM KELAR

Targ'il zotdor sigirim  
Tug'di ajoyib buzoq.  
Do'mboqqina, yoqimtoy,  
Yarmi qora, yarmi oq.

Onasining sutini  
Sog'ib oladi oyim.  
Buzoqchamni bo'zlatib  
Bog'lab qo'yishar doim.  
Turar yana bog'log'liq.  
Tuyular menga go'yo,  
Uning dil-bag'ri dog'liq.  
Hol so'ragan bo'laman,  
Peshonasin silayman.  
Ipdan bo'shataman-da,  
Dala yoqqa yo'llayman.  
To'g'ri kelgan tarafga  
Shataloqlab yugurar.  
Ekinlarni payhonlab,  
Ipinu sudrab yurar.  
Yon qo'shnimiz Shotursun  
Quvib haydar uy tomon.  
Yo'lma-yo'l o't chimdalab,  
Nafsin yig'olmas hamon.  
Yuvilgan ko'ylakni u  
Bir chetdan yamlay boshlar.  
Mehnatiga achinib  
Opam dilini g'ashlar...  
Ulg'ayib bo'lib qolar  
Tuppa-tuzuk buqacha.  
Suzag'on, hech yoniga  
Borolmaydi ukacham.  
Tinmayin yem yeyishdan  
Jag'i aslo toliqmas.  
Ipin uzib yuborar,  
Shoxini siltasa bas.  
Nachora, burnin teshib,  
Zanjirlagan davrdan  
Yog'och to'sinda turar,

Tushganday u hovurdan.  
Oxurida bor yemni  
Pish-pish qilib titadi.  
Nahotki uning umri  
Endi shunday o'tadi?!  
Etim uvishib ketar,  
Ichim achishib ketar.  
Bog'lanmay, yayrab yursang,  
Buqacham, endi netar?!  
Boshim ko'kka yetardi  
O'jar bo'lmasang agar.

### **HAYVONOT BOG'IDAGI MAYMUNNING SIRKDAGI MAYMUNGA MAKTUBI**

Esingdami, ikkalamiz  
Kelganmiz bir o'rmondan.  
Noliyapti deb o'ylama  
Na turmush, na zamondan.  
Sakrab, o'ynab yashayapman  
Men hayvonot bog'ida.  
Ammo do'stim, sen tushasan  
Yodimga goh-gohida.  
Sirk bir dunyo. Bolaliging  
Tahsinlarga ko'milib,  
Yashayapsan nur qo'ynida  
Mehr, zavqqa cho'milib.  
Goho quvnab, velosiped,  
Goho motosiklni,  
Haydaysan goh mashinani,  
Hayron qilib har dilni.  
Gohi uchib arg'imchoqda,  
Gohida kuy chalasan.  
Odamlarni zavqlantirib,

O'zing ham zavq olasan.  
Shuncha chapak yetmaganday,  
Ustoz akang yetaklab,  
Yana tahsin olib berar  
Olomondan etaklab.  
Shuhrat, omad qarsak bilan  
Daryo kabi quyilar.  
Dunyo bu payt ko'zginangga  
Baxtli rangda tuyular.  
Ovqatlarning tansig'ini  
Senga tanlab berishar.  
Hatto sirkning kattalari  
Qo'l ushlab ko'rishar.  
Istaganda sayr qildirar,  
Erkalashib suyushar.  
Qo'g'irchoqday yasantirib  
Kiyintirib qo'yishar.  
Yotish olddan orom berib  
Yuvintirar sovunlab.  
Boshginangdan menikiday  
Shamol esmas huvillab.  
Pista tashlab biron bola  
Seni qilmas kalaka.  
Jigarginam, bilib qo'ygin,  
Bizda hayot shunaqa.  
Sal sovuqqa yo'q bardoshim,  
Titroq kirar tanaga.  
Yaxshiyamki, qish kelganda  
Olishadi panaga.  
Zerikmaslik uchun berib  
Qo'yishadi arg'imchoq.  
Umrin o'tar bo'lib bunda  
Bolalarga ovunchoq.  
Seni dildan sharaflayman,

O'sgin deyman yana ham,  
Qoyil qilgin san'atingga,  
Ko'rma aslo zarra g'am.  
Mehr bilan quchay desam,  
Senga yetmas qulochim.  
Chin yurakdan qutlamoqdan  
Yo'qdir o'zga ilojim.  
Kezi kelsa meni ham bir  
Eslab qo'ysang bo'lgani,  
Unutmagin unib-o'sgan  
Issiq ona o'lkani.

### KOSADUM

Qadimdan qolgan naql,—  
Hammamizga teng ma'qul:  
Yomon yeydi boshini,  
Yaxshi yeydi oshini.  
Yaxshilik — hayotbaxsh nur,  
Dillarga berar huzur.  
El-xalqqa xizmat etib,  
Ezgulik kelar yetib.  
Ming yillik bunyod kelar,  
Sevimli hayot kelar.  
Yomonlik — zo'r falokat.  
Yovuzlik — bir shum ofat,  
Turgan-bitgan kasofat,  
Umlarga halokat.  
Shum xayol kirsa dilga,  
Zarar keltirar elga.  
Ne bir zamonlar o'tib,  
Yomonlik ketar yitib.  
Ammoki barbod qolar,  
Hayxot, dod-faryod qolar.  
Kimki qilsa yomonlik,

Koʻrmas aslo omonlik.  
Oʻtib qancha zamonlar,  
Yitib ketgan yomonlar —  
Ichra boʻlgan bir mahluq,  
Qilmish, kechmishi xunuk.  
Nomi Kosadum ekan.  
Yovuz, yirtqich, shum ekan.  
Dumi kosaday boʻlgan,  
Ichi olovga toʻlgan.  
Umrida bilmay shafqat,  
Dumidan purkab ofat,  
Hayot kulin sovurib,  
Yurgan oʻtda qovurib.  
Koʻrgach uning qorasin,  
Yomonlikning chorasin,  
Topmoq istab jonivorlar,  
Tirqirab qochib, zorlar.  
Hamma parranda, hayvon,  
Kosadumga hech qachon  
Kelmaylik deb roʻpara,  
Boʻlib sarson-ovora  
Tarqalishib toʻrt tomon,  
Yashiringan har zamon.  
Kosadumlar podasi,  
Tentib yurar adashib.  
Zulm qilmoqchi boʻlar,  
Zugʻum qilmoqchi boʻlar.  
Biron sharpa kelmas duch,  
Yovuz fikri boʻlib puch,  
Togʻ yonidan oʻtganda,  
Naq toʻqayga yetganda  
Kosadumlar kengashib,  
Bir-biriga toʻqnashib  
Derlar koʻngil ochaylik,  
Keling, olov sochaylik!

Dumlaridan o't chaq nab,  
To'qay yonadi chat nab.  
Olov bilan o'ynashib,  
Jonlarini qiynashib —  
Kuyib kulga aylanar,  
To'qay cho'lga aylanar.  
Tinchlikka bo'lmay qalqon,  
G'aflat olovin yoqqan,  
Kosadumlar avlodin  
Mangu tingan hayoti.  
Shudir qissadan hissa,  
Dunyoda biron kimsa  
Bo'lsa Kosadum misol,  
Topib isnodli zavol,  
Tutab yonib yurtida,  
Qovrilar o'z o'tida.

### SADOQAT

Qadim Turon tuprog'i  
Son-sanoqsiz jang ko'rdi.  
Birida — naq qora tun,  
O'zgasida — tong ko'rdi.

Vatanimiz boshidan  
Kechgan qancha bo'ronlar,  
Sotqinlarni beshafqat  
Ayamagan turonlar.

Jang tugagan maydonda  
Yotar edi murdalar.  
Ahyon-ahyon yer uzra  
Yaradorlar sudralar.

Otarida cho'ponlar  
O't izlashib tentirar...  
G'oliblardan mittivoy  
Ovuliga cho'g' so'rar...

Bir dam o'tga termilib,  
Mehri yonib jilmayar,  
Kulni olib kaftiga,  
O'rtasiga cho'g' qo'yar.

Shirin jonin unutib,  
Yugurgancha zuv ketar,  
Tap tortmay ovuliga  
Mitti kaftda cho'g' eltar.

Faxri baland jangchilar  
Boqib qolar lol-hayron.  
Dildagi ehtiromin  
Qo'mondon qilar bayon:

Eli uchun qo'liga  
Cho'g' ushlagan o'g'loni —  
Bo'lgan xalqning hech qachon  
Toptalmaydi Vatani.

### **TABARRUK QABUL**

— Ey suvoriy, sizga yo'l bo'lsin,  
Otni nega ketyapsiz qistab?  
— Nasib etsa, xudo mo'l bersin,  
Boshimizga qo'ngusi oftob.  
Shoshmay bo'lmas, olampanohga  
Aytadigan zarur gapim bor.

— Ey taqsim, botmay gunohga,  
Otdan sakrab tushadi sardor.  
Hurmat bajo aylab, tulporin  
Almashtirar terlagan otga.  
Go'yo qanot bog'lab shunqori  
Shiddat bilan talpinar oldga.  
Vatan dardi, elu xalq dardin

Yuragiga olgancha ortib,  
Manzil sari olmay aslo tin  
Yo'l tanobin boradi tortib.  
Kimxob to'nli hokim duch kelib,  
Yo'l bo'lsin, der sizga, birodar.  
Ayting, qayga ketyapsiz yelib,  
Otingizda qolmabdi mador.  
— Nasib etsa ulug' jahongir  
Qabulidan umidim katta.  
— Jahongirning mehri jahondir,  
Hokim sakrab tushadi otdan.  
Tilak tilab og'alarga xos  
— Oq yo'l, sizga xudo yor bo'lsin.  
Ot qulog'in qashlasangiz bas...  
Omadingiz doim bor bo'lsin!

Go'zal bog'lar so'lu sog'ida,  
Ko'chalaru yo'llar ozoda.  
Manzil yaqin qolgan chog'ida,  
Duch kelib, hol so'rar shahzoda:  
— Otingiz xo'p qolibdi charchab,  
Kelyapsiz qaydan qay tomon?  
— Xalq dardini, to'kib solgim bor  
Qabul etsa podshohi zamon...  
Sevgan otin o'ng'arib yo'lga,  
Tilar unga omadu tole.  
Ajablanmang, jilovni qo'lga —  
Olgaysiz, bu — farmoni oliy!  
Bilimdonlar xalqning vijdoni —  
Jahongirning qat'iydir so'zi.  
Yurt kamoli, Vatan darmoni,  
Uyg'oq qalbi, charog'on ko'zi.  
El dardida yongan har dilga,  
Qadimiy Sharq udumin suyub,  
Ezgulikni tugib ko'ngilga,

Tinglash lozim dardini tuyib.  
Hayot kulsin dorilomonda.  
Qalblar o'ksib, bo'lmasin yara.  
Poyoni keng mulki Turonda.  
Katta-kichik hokimlik aro  
Dard tinglovchi barcha eshiklar,  
Darbozalar kengroq ochilsin.  
Vatan, xalqqa dili oshiqlar  
Muhabbati yurtga sochilsin...

Ko'zi tushib tanish tulporga,  
O'ylar: biron qonun, farmoyish  
Talablari ketmay bekorga,  
Ijrosini etar namoyish.  
Uzoqlardan toliqib yelgan  
Sadoqatni anglamoq uchun,  
Shohga ulug' maqsadda kelgan  
Qalb dardini tinglamoq uchun,  
Otalarcha o'rnidan turib,  
Yurtparvarni qilib ming rozi.  
Kutib olar hurmat bildirib,  
Shaxsan Amir Temurning o'zi.

### SAYRDA

Uzunquloq sho'x quyon,  
Olmaxon, Tipratikon,  
Istab tomosha, rohat,  
Qilmoq bo'ldi sayohat.  
Quyonda — bir qop sabzi,  
Hech orom bilmas nafsi.  
Olmaxonning yong'og'i  
Shildirar yurgan chog'i.  
Tipratikon olmani  
Ninasiga ilvolib,

Quv nab, yayrab borishar.  
Tun o'tib, tong yorishar.  
Hafta sayin yo'l yurib,  
Yo'l yursa ham mo'l yurib,  
Tog' yoniga yetishdi,  
G'or yonidan o'tishdi.  
Uchrab qoldi bir bo'ri,  
Bo'rilarning eng zo'ri.  
Olmaxon tez dirillab  
Quy on qochdi pirillab.  
Tiptatik on ham shu choq  
Bo'ldi dumaloq koptok.  
Futbol to'pi deb bo'ri  
Tepganda,

qurib sho'ri...

Qon oqib cho'loq bo'ldi,  
Oqsoq ham mo'loq bo'ldi.  
Zum o'tmay tiptatik on,  
Olmaxon hamda quy on —  
Sheriklarin chamalab,  
Yetib bordi dumalab.  
Do'stlar quv nab ko'rishdi,  
Yana olg'a yurishdi.  
Kezishib sahro, cho'lda,  
Daryo duch keldi yo'lda.  
Suzish emas-ku o'yin,  
O'tmoq ko'p bo'ldi qiyin.  
Tashvish juda mo'l keldi,  
Bir qop yong'oq qo'l keldi.  
Qopga minib ikkovlon,  
Daryoda etar javlon.  
Tiptatik on tortqilab,  
Shaloplatib, turtkilab,  
Zo'r bergandan aqlga,  
Chiqib oldi sohilga.

Tunashdilar qirg'ozda.  
Vahm, qo'rquv yurakda,  
Ikkalasi bexosdan,  
Qorong'ida bilmasdan  
Do'sti Tipratikonni  
(Son-sanoqsiz tikonni)  
Ming afsus, oldi bosib,  
Jonlari og'rir achib.  
Do'sti kechirdi, biroq —  
Uyatdan titrar yurak.  
Qilolmay ko'ngilchog'lik,  
Uquvsizlik, qo'rzoqlik  
Boshga bir balo bo'ldi,  
Sayohat chala bo'ldi.

### **O'XSHAMAY KETGUR**

Yaylovda o'tlab yurar  
Tuya, Eshak, Ot.  
Bolalari yayrashib  
Qilardi rohat.

Kutmaganda to'polon  
Boshlanib qoldi.  
Gurssa-gurs bir-biriga  
Tashlanib qoldi.

Ot va Tuya baravar  
Deyishdi dangal:  
— Qaysi Eshak janjalni  
Boshladi avval?

Chipor moda erkasin  
Aybin yashirib,  
Ta'rifu tavsifini  
Qildi oshirib:

— Eshak demang bolamni,  
Hozircha kurra.  
Peshonasin, voy sho'rim,  
Kim qildi g'urra?

Ko'p xushbichim, yarashiq  
Shalpang qulog'i.  
Eng muhimi, samimiy,  
Toza yuragi.

Hoy, Ot, xudo saqlasin  
Toychoq'ingizdan,  
Xo'tik isi yoqmagan  
Olchog'ingizdan.

Tuya, siz ham yuribsiz  
Bo'talog'im deb.  
Esiz, bo'la olmas u  
Umringizga zeb.

Boshdan oyoq boqsangiz,  
Yo'q to'g'ri joyi...  
Shu ham farzand bo'ptimi,  
Vo-ey, xudoyim!

Sho'rlikning g'alvasidan  
Uyalgan bo'lib,  
Ota-ona hurmatu  
Izzatin qilib.

Tortinibroq turardi  
Toychoq, Bo'taloq.  
Kurra esa otardi  
Badtar shataloq.

Oyoqlari g'izillab,  
Erkin havolab,

Naq oyisin jag'ini  
O'tdi savalab.

Jon achchig'i, depsinib  
Dodlar: "Yer yutgur,  
Voy, eshak-a, Eshakka  
O'xshamay ketgur"!

### **SAHROYI QUSHLAR**

Uzoqdan uchib kelgan  
Chipor qushboshi,  
Nopisand, mag'urona  
Ko'tarib boshin,  
Ey, sahroyi qushchalar,  
Qani, xo'sh, dedi.  
Tiriksanmi, do'stlikka  
Hissa qo'sh, dedi.  
Farmonim shu: har biring  
Bo'shat iningni,  
O'lmaysanlar, ko'rasan  
Sanlar kuningni!..

Oqko'ngil qushlar ta'zim  
Bajo aylashdi.  
Iliq mehrlarini  
Ado aylashdi.  
Tun-kechalar ko'ziga  
Hech uyqu qo'nmay,  
Xas-xashakni manzilga  
Tashishdi tinmay.  
Vaqtida ovqatini  
Yeyolmay to'yib,  
Saraton issig'ida  
Jizg'anak kuyib,

Tashnalikda azobda  
Kunlari o'tdi.  
Oqibatda ajoyib  
Inlari bitdi.  
Taglarin yumshoq qilib,  
Atrofin bezab,  
Tanlardagi patlarin  
Berishdi to'shab.  
Ayashmadi ming yelib  
Topgan donini.  
Hattoki qo'shiq qildi  
Do'stlar shonini.  
Chipor qushlar chax-chaxlab,  
Yasharkan yayrab,  
Bir kun dedi sahroyi  
Qushlarga qarab:  
— "Sizlar kimu bizlar kim,  
Bunday o'ylangiz,  
Biz yashagan joylarga  
Qadam qo'ymangiz!  
Bu dunyoda yo'q aslo  
Sizdayin g'arib.  
Topshiriq shu, ekinglar  
Jo'xori, tariq!  
Donlari bizga bo'lsin,  
Sizga — somoni.  
Yer bag'irlab uching,  
Qo'ying bizga — samoni!"

Ko'ngilchanlik keltirgan  
Tengsiz g'aflatni,  
O'ylaganda oshar dilda  
Qushlar nafrati.  
Afsus, ular unutishgan  
Nomus-orini,

Kimga yorsin, kimga aytsin  
Ohu zorini.  
Adolatga chorlab yaqin  
O'rtoqlarini,  
Ertayu kech qayrar tumshuq,  
Tirnoqlarini.

Nodon qushlar bir-birini  
Qilmasdan rozi,  
Xolis hukm chiqaradi  
Hayotning o'zi.  
Qish qarsillab, sovuq kirib  
Kelgani hamon,  
Chipor qushlar ahvoli tang,  
Holi ko'p yomon.  
Ko'z oldida mavsum bitib,  
O'zgarar zamon,  
Faqat endi bir amallab  
Saqlash uchun jon,  
Chora izlab uchar issiq  
O'lkalar tomon.

### **HASADCHI ESHAK**

Ko'tarib borishardi  
Quyoning qulog'idan.  
Eshakvoyning hasadi  
Toshqinlar yuragidan:  
— Bu dunyoning ishiga  
Hayron qolaman doim.  
Quyonnikidan bormi  
Qulog'imning kam joyi?  
Boshimizda shalpangvoy  
Juda o'xshash bo'lsa ham,

Umrimda ko'targanmas  
Meni bironta odam.  
So'ng ikkala qulog'in  
Baquvvat ipga bog'lab,  
Ayriga ilintirib,  
Tortgan edi bir boplab.  
Gandiraklab bo'g'ziga  
Allanarsa tiqildi,  
Ko'zi tinib lahzada,  
Naq gursillab yiqildi.  
Hushga kelgach, der bundan  
Kaltak yegan yaxshiroq.  
... Yigitcha jahli chiqib,  
Qilar eshakni so'roq:  
— Bu qanday sharmandalik,  
Uyalgin sal, beta'miz.  
Qulog'ingdan cho'zishsa  
Qilolmasding hatto his.  
Xalacho'pdan yemasang,  
Jilmaysan-ku o'rningdan.  
Yaxshilikni bilmasang  
Chiqadi-da burningdan.  
Shundan beri xo'jasi  
Yuk ortib, minib yurar.  
Ter to'kib ishlar eshak  
Ham kaltakdan eb turar.

### **BEZORI MAYMUN**

O'rmon chetida Maymun  
Tamakini burqsitar.  
Bu nojo'ya qilig'i  
Do'stlarini o'ksitar.  
Mo'riday naq og'zidan

Tutun chiqib kelyapti.  
Ko'plar sarosimada:  
— Maymun nega yonyapti?  
Boshi qotib onasi,  
Voy, uyimiz kuydi, der.  
Otasi: "Bu shumtaka  
Ko'zimizni o'ydi", der.  
Hamma chiqar yaydoqqa  
O't ketdi, deb o'rmonga.  
Asrash uchun yong'indan  
Chopar Maymun tomonga.  
Jon holatda quvlashib,  
Rosa terlab-pishishar.  
Tutib olib bir zumda  
Daryoga xo'p pishishar.  
Chaqnoq ko'zi kirtayib,  
Boshi sarak, qaltirar.  
Yo'talganda o'pkasi  
Ko'kragida shaldirar.  
Rangi so'lib, nafasi  
Naq bo'g'ziga tiqilar.  
Holdan ketib, to'satdan  
Shalop etib yiqilar.  
Ayiq jarroh shoshadi  
Halloslab "tez yordam"ga.  
(Ahvol chatoq bo'lardi  
Kechikkanda bir damga.)  
Der, tuzalgach sayr qilib,  
Mazmunli o'tkaz kunni.  
Zo'rg'a olib tashladim  
O'pkangdan nikotinni.

## SEN TOSHBAQA MINGANDING

Men tushimda toy mindim,  
Minganding toshbaqani.  
Dedim: "Marramiz uzoq,  
Otingni qista, G'ani!"  
O'ylardim: bu bir umr  
Mendan aslo o'tolmas.  
Marrani ming oshsam ham,  
Bu, bir marta yetolmas.  
Bir vaqt sening toshbaqang  
Imillab yurib ketdi...  
Yo'lda jilov tortqilab  
Madorim qurib ketdi.  
Ahvolingga achinib,  
Toydan tushib ham ko'rdim.  
Nomardlik bo'lmasin deb,  
Ancha piyoda yurdim...  
Esnoq bosgandan bosdi,  
Mudroq ham keldi bir payt.  
Hatto sezmasdan qoldim  
Qachon deganing: "ho', hayt!"  
Ko'z ochsam, toshbaqangni  
Bir burgut olib ketdi.  
Qanotin o'rtasiga  
Seni ham solib ketdi.  
Xayolim sahrosida  
Qoldim men hang-mang bo'lib.  
Charx urishingni ko'rib  
Turardim garang bo'lib.  
Uzun qo'llaring bilan  
Bulutlarni qucharding.  
Uchqur toyim ustidan  
Qah-qah urib ucharding.

Har qanday marra-manzil  
Senga bir qadam edi.  
Mening-chi yuragimda  
Hayrat va alam edi.

### FIL VA SAYYOH

Qulagan tog'day bo'lib  
Yotarkan bahaybat fil.  
Uchratib qolib sayyoh  
So'rabdi undan ko'ngil:  
"Devday savlating bilan  
Ko'p shalvirab qolibsani,  
Yo biron og'ir ishdan  
Rosa charchab tolibsan.  
Ha, topdim, sho'ring qursin,  
Ko'zlaring to'la yosh-ku!  
Dardingga chora topmay,  
Holingga diling g'ash-ku.  
Yiqitibdi-da seni  
Uying kuygur mikrobu.  
Butun a'zo-badaning  
Turibdi-ya titrab".  
Fil der, mikrobu deganing  
Judayam serviqormi?  
Osmondaymi, tagimda —  
Turgan shu yercha bormi?  
Sayyoh filning ko'ziga  
Mikroskopni tutadi.  
Mikrobu qilgan zarardan  
Dardin ichga yutadi.  
Yanchib, bosib yurardi  
Har bir uchragan g'ovni.  
Ne chora yengolmasa  
Ko'zga ko'rinmas yovni?!

## CHUMCHUQ VA QUMURSQLA

Holdan toyib bir chumchuq  
Yotardi xas uyada.  
Kelib qoldi qumursqa,  
G'azabi ko'p ziyoda.  
Jig'ildonin mo'ljallab  
Jon-jahd bilan soldi chang.  
Chumchuq der, hoy, hovliqma,  
Avval aytgin muddaong.  
— Esla, jig'ildoningda  
Mening qancha donim bor.  
Demak, sening bo'yningda  
Qolgan halol nonim bor.  
Chumchuq der, ho, notanti,  
Shunga shuncha g'azabmi?  
Arzimagan don uchun  
Shirin jonga azobmi?  
Sen ham allaqaylardan  
Donni tortib kelarding.  
Ekib o'rmay, dehqonning  
Xirmonidan yularding.  
Bilmaysanmi shuni ham,  
Qani, menga qara-chi,  
O'g'rini-chi har doim  
Urrib kelgan qaroqchi.  
O'zing to'g'ri bo'lmagach,  
Aytib ko'r-chi, arzingni.  
Jig'ildonga tegma, past,  
Olib bo'psan qarzingni.

## G'YBATCHILAR VA SEHRGARLAR

Qachonlardir  
Bir zamon,  
G'iybatchilar  
Beomon,  
Fildan pashsha  
Yasagan.  
Shu kasb bilan  
Yashagan.  
Pashshalar ko'p  
Salmoqli,  
Fillar qolgan  
Sanoqli.  
Nodon qilgan  
Bir g'iybat,

Keltirgandir  
Zo'r kulfat.  
O'tsa hamki  
Ko'p zamon,  
Ahvol o'zgarmas  
Hamon.  
Sehrgarlar  
Tirishib,  
Dono ishga  
Kirishib,  
Ming pashshadan  
Shuni bil,  
Yasay olmas  
Bitta fil!

## FILNI KO'TARGAN CHUMCHUQ

Fil go'yoki  
Bemajol,  
Yurish unga  
Ko'p malol.  
Hushi kelmay,  
Toliqib,  
Esnoq bosar  
Zerikib.  
Xartumiga  
Bir chumchuq  
Qo'nib der:  
Ustimga chiq.  
Manzilingga  
Tez, chaqqon

Yetkazaman  
Shu zamon.  
Qani, ketdik,  
Olg'a bos!  
Fil yo'l olar:  
Lors-lors-lors.  
Chumchuq kuylab  
Boradi,  
Fil shod yayrab  
Boradi.  
Yengil,  
Borday qanoti,  
Toshar kuchi,  
G'ayrati.

## QO'RQOQ OVCHI

Qo'sh og'izli ov miltig'in  
Yelkasiga osib bir kun,  
Tog' bag'riga, changalzorga  
Ov qilgani chiqdi Erkin.  
Tor yo'lakdan yurolmayin  
Kiyimlarin yuldi tikan.  
Endi boshqa kasb tanlayman —  
Der, ovchilik qiyin ekan.  
Ovdan quruq qaytar edi  
Vahshiy "yo'lbars" uchrab qoldi.  
Qo'rqqanidan ko'zin yumib  
Cho'zilganicha yotib oldi.  
Dag'-dag' titrab, esankirab.  
Ko'tarolmay boshin yerdan  
Tavakkalga miltig'ining  
Qo'sh tepkisin bosdi birdan...  
Sho'x bolalar o'yin qilib  
Loydan yo'lbars yasagandi.  
Tanasini beqasam rang  
Qilib rosa bezagandi.  
Qo'rqa-pisa o'z o'rnidan  
Kech kirganda turar Erkin.  
Holsizlanib, rangi o'chib  
Uyga kirib keldi sekin.  
— Tobing qochib qoldimi, ayt,  
Onasi der:— Nima bo'ldi?  
— Bir yo'lbarsga uchrab qolib  
Qutulguncha rosa o'ldim.

## FILNING QULOG'I NEGA OSILIB QOLGAN?

Bir vaqt filning qulog'i  
Ochilib qolgan ekan.

Poylab eshitgan gapi  
Doimo yolg'on ekan.  
Kim qayerda gapirsa  
Pisib eshitar ekan.  
Gapga olam gap qo'shib  
Tinmay shipshitar ekan.  
Bu quloqning dastidan  
Shunda ko'plar pand yegan.  
Bu quloqni burashga  
Ko'plar orzumand ekan.  
Bu quloqni uzay deb,  
Ko'p ekanu poylashgan.  
Bu qulog'i qurmag'ur  
Ko'p balandda joylashgan.  
Doim uni qo'riqlab  
Turar ekan xartumi.  
Ortdan poylab kelganga  
Bor ekan hushyor dumi.  
Xullas, filning qulog'i  
Ko'p paytlar tik turibdi.  
Eshitmagan gapni ham  
Eshitdim deb yuribdi.  
Biron tirqish ko'rinsa,  
Yo kovakni ko'rsa ham,  
Qulog'in tutib darrov  
Gap tinglarkan o'sha dam.  
O'z inimmi deb o'ylab,  
Bitta sichqon kiribdi.  
Qulog'ining ichida  
Maza qilib yuribdi.  
Fil og'riqning zarbidan  
Har tomon yuguribdi.  
Goho yerga dumalab,  
Goh turib bo'kiribdi.

Bekorchi gap tinglashdan  
Majolsiz tolgan ekan.  
Filning qulog‘i shunda  
Osilib qolgan ekan.

### HAKIM LAQQI

Qayda ko‘rsang Hakimjon  
Tiliga zo‘r berardi.  
Bopladimmi deganday  
Xo‘p kerilib yurardi...  
Maza-matrasiz, chuchmal —  
Gaplari edi chakki.  
Hamma tanishlar uni  
Der edi Hakim laqqi.  
U o‘ylardi bir kuni:  
"Bo‘lmasa hamki qo‘li,  
Har ishni qoyillatar  
Nahang baliqning tili.  
Istagan lahzada u  
Tilini qimirlatib,  
Har qanday baliqni ham  
Og‘ziga olar tortib.  
Naq nahangning tiliday  
Bo‘lsaydi mening tilim.  
Shunda yozish-chizishdan  
Toliqmas edi qo‘lim..."  
Shu kabi xom xayollar  
Unga xo‘p yoqib ketdi.  
Qaydandir kelib tilin  
Bir ari chaqib ketdi.  
Tili shishib, og‘ziga  
Sig‘may qoldi shu zamon.  
Shundan beri deydi u:  
"Tilning uzuni yomon".

## ZO'R OVCHI

(Hazi)

Yakshanbada ko'plashib  
Tog' sayriga yo'l oldik.  
O'ngirda bir ovchiga  
To'satdan uchrab qoldik.  
Dedik, bunda amaki  
Ovlaysizmi burgutni.  
U der, cho'qqiga chiqib,  
Otib oldim bulutni.  
Zamburug', qo'ziqorin  
Terib, yedim pishirib.  
Minib oldim bulutni  
Rosa puflab, shishirib.  
Tog' bag'riga yetganda  
Siqib ichdim suvini.  
So'ng rahmim kelib sekin  
Qo'yib yubordim uni.  
U osmonga termulib,  
Der, kelinglar, panaga.  
Meni deb, siz, do'stlarim  
Qolmang aslo jalaga.  
Bulut sho'rlik yetvolib  
Onasiga chaqadi.  
Ko'ryapsiz-ku, bolalar,  
Hozir yomg'ir yog'adi.

## AFSUS

Eshak dedi  
Kurrachaga,  
Peshonasi  
G'urrachaga:  
Kapalayver

Ko'knorini,  
Yozar diling  
Xumorini.  
Oxurchaga  
Imo qilib,

Ichgin dedi  
Xursand bo'lib.  
Kayf-safoni  
Doim didlab,  
Hech bo'lmasa,  
Ko'rgin hidlab.  
Nasihatin  
Uch-to'rt karra  
Bajaradi  
Yuvosh kurra.  
Ichib, hidlab,  
Kapaladi,  
Umrin og'u

Tataladi.  
Tani teshik —  
Yara bo'lib,  
Yurar qashqa —  
G'urra bo'lib.  
Kundan-kunga  
Nochor, badtar,  
Holsizlanib  
Tap-tap yotar...  
Guldoy umri  
Nobud, esiz.  
Befoydadir  
Endi afsus.

## MIMIT

Senga juda rahmim  
Keladi, Mimit.  
Goh g'azabdan qahrim  
Keladi, Mimit.

Jismingni hayotmi,  
Kim ezib ketgan?  
Haqiqiy ismingni  
Hamma unutgan.

Yoshing o'n sakkizdan  
Oshib ketsa ham,  
Hatto o'n to'qqizga  
Borib yetsa ham.

Tengdosh do'stlaringdan  
Orqada qolib,  
Qilmish ko'zlaringga  
Qitmirlik solib,

Lol qilib romingga  
Kichkintoylarni,  
Tushirib domingga  
Jujuqvoylarni.

O'rgatib burchakda  
Pusib chekishga,  
Qo'lga tushgan chog'da  
Yolg'on to'qishga...

Bolalarga nega  
Hidlatib benzin,  
Hammaga tasqara  
Qilasan yuzing.

Endi gumonsirar  
Doim kattalar.  
Aybni sendan ko'rar  
Ona-otalar.

Deyishar, uqtirib  
Har bir bolaga:  
Kasofat yuqtirib,  
Qolma baloga!

Senga mitti qalblar  
Ishonchi so'ndi.  
Ularga lof gaplar  
Ketmaydi endi.

Hech narsani sezmay,  
Puchgina bo'lib,  
Ulg'aymasdan, o'smay,  
Kichkina bo'lib,

O'tib borar vaqting,  
Tengdoshsiz, do'stsiz.  
Ochilarmi baxting  
Bu holda, esiz!

Senga juda rahmim  
Keladi, Mimit.  
Goh g'azabdan qahrim  
Keladi, Mimit.

### QAYISHQOQLAR

Aravaga qo'shilgan  
Otni ko'rganda Toychoq.  
Oh, otam, deb ko'zidan  
Yosh oqdi munchoq-munchoq.

Xayolida bir bola  
Bu Otni kishnatardi.  
Temirga kuch bag'ishlab,  
Xalq uchun ishlatardi.

Qo'shga qo'shilgan ho'kiz  
Zo'rg'a omoch tortardi.  
Buzog'i, sho'rlik otam,  
Deb hasratga botardi.

Rahmdil bola esa  
Uni qo'yib yubordi...  
Uyida temir ho'kiz  
Ekin ekib yig'ardi.

Zulmga zo'r isyondir  
Shafqat to'la farazlar,  
Ezgu hayot kashf etar  
Sofdil xayolparastlar.

## **QOCHIB QOLAYLIK**

**Etik kiygan Mushukning  
Rasmini ko'rib Quyon:  
Tepishmoqchi shekilli,  
Der, bu sichqonlar bilan.**

**Mo'ylovi naq nayzaday,  
Janjal sevgan oshnasi,  
Tezroq qochib qolaylik,  
Tegib ketmay poshnasi.**

## **TINIM BILMAS SHAMOLVOY**

**Shamolvoy hech turmas tek,  
Bir qadamday yeru ko'k.  
Goh o'ngdan kelaverar,  
Goh chapdan yelaverar.  
Goh pildirar koptogi,  
Goh qo'lida kitobi.  
Charchash bilmas aslida,  
Yilning har to'rt faslida.  
Ha, ezgu tashvishi ko'p,  
Doim uning ishi ko'p.  
Tinim bilmay shoshadi,  
Tog'u toshlar oshadi.  
Boshlanganda Yangi yil  
Maqsad bilan olar yo'l.  
Qishda rosa chiniqib,  
Sof havoda tiniqib  
Baland yalang qirlardan,  
Mislsiz adrlardan  
Qor uchirib kezadi,  
Kuchga to'lib esadi.  
Oqqa belab bog'larni,  
Qorga burkar tog'larni.**

Bahorda qor ko'chsin, der,  
Ekinzorni quchsin, der.  
Ko'ksi orzuga to'lib,  
Esadi iliq bo'lib.  
Daraxtlar uyg'onsin, der,  
Maysalar to'lg'onsin, der.  
Turib doim ahdida,  
Changlantirar vaqtida:  
Bekor to'kilmasin gul,  
Hosil doim bo'lsin mo'l,  
Deb joni behalovat,  
Ekinga hushyor har vaqt.  
Osmonga bulut toshar,  
Shamolvoy yelib shoshar.  
Qamchi bosar do'l, selga,  
Qoch der, ekinsiz cho'lga!  
Kelganda mayin yomg'ir,  
Der mehring yerga yog'dir!

Jazira issiq yozda  
Bug'doy yetilar rosa.  
Oltin boshoq cho'g'lanar.  
Shabadada to'lg'onar.  
Orzu toshar yurakda  
Gullay boshlaydi paxta.  
Qilishib rosa g'ayrat,  
Qurt-qumursqa, hasharot  
Ekinga qilar hujum.  
Shamolvoy sezib shu zum  
Esib, ekin oralar,  
Hasharotlar yo'qolar.  
Qurt-qumursqa dumalar.  
O'z ishidan quvonar,  
Qo'rqmas, hayiqmas aslo,  
Uyg'oq kezadi rosa.  
Tinib qolgan qo'llarni,

Uxlab yotgan yo'llarni,  
Qitiqlab uyg'otar u.  
Quvnashni o'rgatar u.  
Daryo, dengiz — ummonga  
Tog'dan baland osmonga,  
Jimlik — sizga falokat,  
Qiling deydi harakat.  
Der kekxa chol-kampirga,  
Rahmat aytib taqdirga,  
Suyansangiz ham hassa,  
Tinib-tinchimang aslo.

Aziz ota-onalar,  
Kamol topsin bolalar,  
Deb g'ayrat qiling har vaqt,  
Uyg'oq yashash katta baxt!

Ey shamolvoy — jajjilar,  
Aqli o'tkir — konchilar,  
Ilm konin izlovchilar,  
Fikrini tezlovchilar,  
O'ynab-kulib — yaraqlang,  
Kitoblarni varaqlang.  
Bu bepoyon jahonni,  
Dunyodagi insonni  
Keltiring harakatga,  
Sergak boqsin hayotga.  
Hamma shamolday erkin  
Yashasin ozod, durkun.

## **YURTPARVARLIK — MARDLIK ISHI**

Urushni kim  
O'ylab topgan.  
Duch kelganni  
Otgan, chopgan.

Ota-ona,  
Bobolarni,  
Qon qaqshatgan  
Bolalarni.

Yolg'unchilar,  
Tekinxo'rlar.  
Yo'lto'saru  
Mushtumzo'rlar.

Halol yashash  
Yoqmaganlar,  
Urushlarni  
Yoqlaganlar.

Kimga agar  
Kulib omad,  
Tinch mehnatda  
Topsa shuhurat.

Boyiganin  
Ko'rolmasdan,  
Fitnachilar  
Doim qasddan

Uyushtirib  
Turli tuhmat,  
Qilishmagan  
Zarra shafqat.

Aralashgach  
Ishga shayton,  
Ne yuraklar  
Bo'lgan vayron.

Urushqoqqa  
Qo'l bermasdan,  
Asablarga  
Yo'l bermasdan.

Tinch yashamoq  
Ko'ngil hushi,  
Yurtparvarlik  
Mardlar ishi.

### **NOMI O'CHIB KETADI**

Hamma dildan tinchlik istab,  
Desa agar omonlik,  
Zarracha ham xayoliga  
Keltirmasa yomonlik.

Bir-ikkita buzg'unchilar  
O'z boshiga yetadi.  
Yer yuzida urushning  
Nomi o'chib ketadi.

## MINGOYOQNING XAYOLI

Bir kuni deng  
Mingoyoq,  
Qilganmish  
Shunday xayol:  
Ming oyog'imga  
Shu choq  
Kiyib olsam  
Ming paypoq,  
Yaraqlatib  
Ming etik,  
Yursam bardam  
Va tetik.  
Oyog'imga  
Qarashib,  
Ko'plar qolardi  
Shoshib.  
Har bir ko'rgan  
Odamga,

Tanilardim  
Olamga.  
So'ng fikridan  
Uyalib,  
Qolar xayolga  
Tolib.  
Besh yuz bola  
Naq chaqmoq —  
Kiysin besh yuz  
Juft paypoq.  
Hamda besh yuz juft  
Etik.  
Ularga bo'lsin  
Tortiq...  
Menda ko'p bo'lsa  
Kiyim,  
Kiyib echishim  
Qiyin.

## XOTIRA

Mittigina kampirning  
Bor edi juft echkisi.  
Hovlisidan erta-kech  
Kelar edi sut isi.  
Aql bilan turmushin  
Tebratardi ochig'i.  
Jajjigina xumchada  
Tayyor edi qatig'i.  
Kelganida mehmonga  
Yaqin urug'-aymog'i,  
Shokosada suzilib

Turar edi qaymog'i.  
Nevarayu chevare  
Quv nab-yayrab yurishar.  
Nordon-sho'rtak qurtlarni  
Maza qilib so'rishar.  
Kech kirmasdan taralar  
G'ilmindining xush bo'yi.  
Zavqqa to'lib yashardi  
Mitti kampir shu ko'yi.  
Mo'jaz uyning yonida  
Kaftdek yeri bor edi.  
Hosilining har yili  
Fayzi, qo'ri bor edi.  
Yoz faslida tut qoqib  
Yashardi o'z holicha.  
Hovlisiga ko'rk edi  
O'rik, yong'oq, olucha.  
Atrofida taralib  
Turardi rayhon isi.  
Uzilmasdi yil bo'yi  
Murabbosini, shinnisi.  
To'rttagina tovug'i  
Tuxum berar beminnat.  
Kampir doim kuymanib  
Tinmay qilardi mehnat.  
Hayotida bir umr  
Intilish, umid edi.  
Turmushida shu sabab  
Barakayu qut edi.  
Yashar edi ishlatib  
Aql, farosat, miya —  
Harakatin ichida  
Edi jishtarbiya.  
Bel og'rig'in bilmasdi

To'qsonga kirganda ham.  
Kampir edi ko'p quvnoq,  
Kampir edi ko'p bardam.  
Ozodalik bobida  
Buvilarning sarasi,  
Sanalardi maktabning  
Eng sevimli farroshi.  
Bizlar edik kampirga  
Nevarayu chevara,  
Har bir o'g'il — Baxtixon,  
Qizlar edi — Sevara.  
Ketdi kampir hayotdan,  
Unutmaymiz biz sira.  
Qoldi undan manguga  
Bir insoniy xotira.

### **SUMALAKTOSH**

Har yilgiday bahor chog'i  
Pishiray deb zo'r sumalak,  
To tonggacha qozon kavlab  
Kuymanamiz, jonlar halak.  
Erta tongda buvim suzib,  
Qo'shnilarga ulashadi.  
Sumalak yeb, boshi ko'kda,  
Kichkintoylar quvnashadi.  
Sher qozondan olib deydi:  
— Menga kerak sumalaktosh,  
Baholarim "besh" qilib ber,  
Eh, sehrli yumaloq tosh.  
Maktabida so'rar shu kun  
O'qituvchi o'tgan darsni.  
Cho'ntagidan bosib turgan  
Tosh eshitmas dilda arzni.

Xayolidan o'tkazar u,  
Yana ishim bo'ldi chakki,  
Nega buncha yopishasan,  
Qasding bormi menda "ikki?"  
Tanaffusda alam bilan  
Toshni siltab otgan chog'da,  
Sinf oynasi chil-chil bo'ldi,  
Boshi gangib, qoldi dog'da.  
Siniq oyna degan kabi,—  
Achinaman ahvolingga,  
Nahot halol mehnat qilish  
Kelmas aslo xayolingga.  
Jonsiz toshdan najot kutmay,  
Yurmaysanmi sherday bo'lib.  
Kim ham seni odam sanar  
Yashamasang nurday bo'lib.  
Shu payt o'zin g'o'rliciga  
Ichdan ko'ngli buziladi,  
Parchalangan shishalarga  
Boqib bag'ri eziladi.  
Va'da berar, derazajon,  
Kechir, seni tuzataman,  
O'zing guvoh bo'lg'in endi  
Yalqovlikni tugataman.  
Sumalaktosh sehriga hech  
Ishonmayman hayotimni.  
Peshonamdan terlar to'kib,  
Yarataman omadimni.

### **O'Z NOMIDA**

Hayronman, ko'plar nega  
Paxtani oltin degan,—  
Shu lattani oltin degan.

Pilla qurtin tilla deb,  
Ipakka berishgan zeb.

Aytmay o'z ismin, otin:  
Ko'mirni — qora oltin,  
Bug'doyni — sara oltin,  
Odamni — tilla odam,  
Deb maqtashgan damba-dam.

Shu o'xshatishlar rostmi?  
O'ylab qaralsa asli,  
Odam oltindan pastmi?  
Bug'doy — hayot emasmi?  
Bir olam otashi bor,  
Bag'rida quyoshi bor  
Ko'mir oltinga xosmi?

Laganbardorlar kasbi  
Maqtovni oshirishdir —  
Aybingni toshirishdir.

Maqtovga tushgan narsa,  
Maqtalib, nari borsa,  
Bahosi pastlab battar,  
O'z nomini yo'qotar.

Maqtovga tushgan odam,  
Maqtovga uchgan odam  
Bir kun haq so'zligini,  
Unutar o'zligini.

Neki bo'lsa dunyoda  
Qadr topib ziyoda,  
Qolmay maqtov komida,  
Atalsin o'z nomida.

## QOROVUL

Qo'shni Oltmishboy bobo  
Qurilishda qorovul.  
Har qanday sharoitda  
Xizmat sari olar yo'l.  
O'g'irlik bo'lmasiga  
Ko'zi aniq yetsa ham,  
Miridan-sirigacha  
Tekshirib chiqar har dam.  
Atrof dim, havo og'ir,  
Ko'ngli xijildir bu gal.  
Oyog'i tortmay yurar,  
Ishida borday chigal.  
O'z o'rnidan siljigan  
Taxta va simni ko'rib,  
Yuragi ortga tortib —  
Ketdi u xayol surib.  
Ishni qabul qilganda  
Narsalar edi tugal...  
Endi boshliq oldida  
Yaxshimi bo'lsa o'sal?  
Xayolga berilar u.  
Chatoq-ku, bu nimasi?  
Uch-to'rt bola o'tganday  
Bo'lgan edi chamasi.  
Bir oz diqqati ortib  
Nariroqqa yurar jim.  
Yotardi singan taxta,  
Sochilib yotardi sim.  
Bolalar vijdoniga  
Qilmoq uchun arzu hol,  
Taxminlab kirib bordi  
Sifga qorovul chol.

Narzi darozning sag'al  
Qo'li tilingan edi.  
Qing'ir ishi rangidan  
Go'yo bilingan edi.  
Chol so'zlar, o'tgan ishni  
Zarra qilmasdan pesha.  
"Avval har o'g'il-qizga  
Zarur doim andisha.  
Qurilishda gohida  
U-bu narsa titilib,  
Sezmay qolasan, gohi  
Ketar nobud etilib.  
O'yinqaroq bolalar  
O'ylamay qilgan bu ish  
Kimga foyda keltirar,  
Kimga zarar, ayting, xo'sh?!  
Beg'am zararkunanda  
Qilmaydimi yoki or.  
Isrofgarning aslida  
O'g'ridan ne farqi bor?  
Endi yotsam bo'lardi  
Nafaqani tushirib.  
Mehnat qilib topganim  
Yeyman halol pishirib.  
Qorovullik qilganman  
Doim xalqning mulkiga.  
Yuzim yorug', shu sabab  
Qolganim yo'q kulgiga.  
Hamma davlat boyligin  
Ko'zday qilsa ehtiyot.  
Balki qorovullikka  
Qolmas edi ehtiyoj.  
Odamlarga ishonmay,  
Qo'riqlamay tosh, g'ishtni,

Birday yelga sovurib  
O'tkazmasdim yoz, qishni".  
Narzi daroz bir chetga  
Egilib yig'lar edi.  
Nomus ichin kemirib,  
Qalbini tig'lar edi.

## **QUYOSH BOLA, OY BOLA**

Boy bolayu, boy bola,  
Quyosh bola, oy bola.  
Poklardan ta'lim olar,  
Sog'lardan ta'lim olar.

Yarashib ilmu hunar,  
Iqboli yashnab kular.  
Olgani olqish bo'lar,  
Dilda ezgu ish bo'lar.  
Eliga ko'z-qosh bo'lar,  
O'n yoshida bosh bo'lar.  
Niyati buyuk bo'lar,  
Xalqiga suyuk bo'lar.

Muomalasi yo'q bola,  
Dag'al, quruq, po'k bola.  
Ishyoqmas, dovdirgina,  
Chuchmalgina, g'o'rgina,

O'zin holiga boqmas,  
Aybin gapirsang, yoqmas.  
Bema'ni, bebosh bola,  
Qirqida ham yosh bola.

Boy bolayu, boy bola,  
Quyosh bola, oy bola,  
Tengidan ustun bola,  
Zehni tez — butun bola.

O'qir, yozar, o'y surar,  
Yuragiga bo'ysunar  
Kundan-kunga boy bo'lar.  
Topgani chiroy bo'lar.

Boy bolayu, boy bola,  
Quyosh bola, oy bola.

### TIPRATIKON

Hovlisiga Karimjon  
Tipratikon keltirdi.  
To'yganicha sut va suv,  
Turli-tuman o't berdi.  
Ammo kunlar o'tsa ham  
O'rganmadi u hamon.  
Karim kelsa yoniga,  
Koptok bo'lar shu zamon.  
U ko'p xunob bo'ladi,  
Nega quvnab yurmas deb.  
Yovvoyi-da, baribir  
Qochib ketar, turmas deb.  
Charchab kelib hovlida  
Bir kun uxlab qolgandi.  
Allaqanday tovushdan  
Juda qo'rqib uyg'ondi.  
Ko'rsa, yonginasida  
Ilon zahrin sochardi.  
Tipratikon ayamay  
Nayzalarin sanchardi.  
O'z-o'ziga der Karim,  
Do'st orttirgin sen har dam.  
Yarar og'ir kuningga  
Hatto "yomon" do'sting ham.

## KURK TOVUQ VA BABAQ XO'ROZ

Qo'shnimizning tovug'i  
Kurk bo'lgan edi.  
Tuxum bosish unga zap  
Ko'rk bo'lgan edi.  
Orzu qamrab borlig'in  
Tun-kechalari,  
Xayolida bo'lajak  
Ko'p jo'jalari.  
Tez orada qiziq hol  
Ro'y bera boshlar,  
Tuxum yorgan "chala"lar  
Ko'nglini g'ashlar.  
Hayron edi bu, mitti  
Bolajonlarga,  
Qanday ovqat yedirsa  
Poloponlarga,  
Chora izlab tan-joni  
Qiy-nalar battar.  
Tuxumlardan jo'jalar  
Chiqishar qator.  
Quvonchidan tovuqxon  
Yayrab qo-qolar:  
"Qanotimni to'ldirgan  
Bola-chaqalar"...  
Beshta tuxum ochilmay,  
Turar tosh bo'lib,  
Tovuq bosib yotardi  
Dili g'ash bo'lib.  
Bu hol tashvishga solib  
Ona kurkani,  
Tovuqning ahvoliga  
Achishib joni,

Der: besh tuxum aslida  
Tegishli bizga,  
Ochib beray, mayliga  
Jo'jasi sizga.  
Jahli toshib tovuqxon,  
Ko'tarib janjal,  
Kurkaning munchog'iga  
Soladi changal.  
Tumshuq, tirnoq tig'idan  
Qutular qochib.  
Tovuq yotar tuxumni  
Qaytadan bosib...  
Poloponlar kun o'tib,  
O'sib-ulg'ayib,  
Pir-r etib, ko'kka uchib  
Bo'lar tez g'oyib.  
Tovuqxon umr bo'yi  
Ochib ko'p bola,  
Bundayini hayotda  
Ko'rmagan aslo.  
Boqsa, ko'p poloponi  
Qisqa nafasda,  
Miltirab turar edi  
To'r sim qafasda.  
Tovuq jonin hovuchlab,  
Dod sola boshlar,  
Xirsdan babaq xo'rozga  
Arz qila boshlar:  
— Ota bo'lmay o'la qol,  
Parvoyifalak!  
Bolamiz uchib ketdi...  
Qafasda — halak!..  
Qizishib bo'ynin cho'zib  
Babaq qo'-qo'lar,

Tovuqni jahl bilan  
Timar, cho'qilar:  
Umring bo'yi yeysan  
Endi dakkini,  
Esi past, kimdan so'rab  
Ochding kakkuni...  
Hammasiga yolg'iz o'zing  
Aybdorsan xolos.  
Mening xo'rozlarimga  
Yurt qilar havas!

### SHUM HO'KIZ

*(Yan Bjexvadan)*

Maysazorda g'ing'illar edi  
qo'ng'iz.  
Naq oftobda toblanardi  
bir ho'kiz.

G'ing'illardi, g'ing'illar edi  
qo'ng'iz.  
Qimirlamay yotar edi  
bir ho'kiz.  
So'ng so'rar u: ayting,  
jonim qo'ng'izvoy,  
G'ing'illashdan foyda bordir  
hoynahoy?  
Qo'ng'iz iliq javob berar  
ho'kizga.  
Men bekorga chalmayman-ku  
sibizg'a.  
G'ing'illashim sabab,  
mana, hayotda

Yashayapman farog'atda,  
rohatda!

— E, g'ing'illash emas  
ekan-da tekin.

— Albatta-da, do'stim ho'kiz,—  
der sekin.

Butun atrof:  
dala, o'rmon — yaproqlar,  
maysa, osmon.

Yo'l — yo'laklar, o'tloqlar

Bir so'z bilan aytsam,  
tengsiz keng jahon

Menikidir g'ing'illashim  
tufayli,

Bilgandirsan endi  
meni og'ayni!

Ho'kiz o'ylar:

"Buni aytar yashash deb!"

Uyga qaytgach

Yarim tunda "mo""rar xo'p.

Shovqin tutib ketar

yaqin-yiroqni.

Changallashib chopar

hamma yurakni.

— Ovozingni o'chir, uyat emasmi,

Ayt-chi, ho'kiz, ozdingmi yo aqldan?

— Men nimadan uyalardim, tirishib —

Qo'ng'iz kabi g'ing'illayman chin dildan.

Odamlar der: yo'q, azizim,

ko'tar qo'sh,

Qani, olg'a, bir chiranib

tortgin, xo'sh.

Bo'kirishdan hech foyda yo'q,  
jon ho'kiz,  
Bilib qo'ygin,  
Sendan chiqmaydi qo'ng'iz!

## TIPRATIKON HAQIDA ERTAK

*(V. Xotomskoydan)*

O'rmonda tipratikon  
Ochibdi bitta do'kon.  
Eshigida peshtaxta,  
Unda yozilgan: "Cho'tka".  
Ko'rgazmada rang-barang.  
Cho'tkalar turar, qarang.  
Bordir istalgan turi,  
Cho'tkalarining eng zo'ri.  
Tish cho'tka, telpak cho'tka,  
Etigu ko'ylak cho'tka,  
Mo'ylov cho'tka, bosh cho'tka  
Ham kiprigu qosh cho'tka.  
Erkak-ayolga birday —  
Cho'tkalar turishar shay.  
Hammaga ro'zg'or uchun  
Cho'tkalar zarur har kun.  
Shu sababdan ham juda  
Savdo-sotiq avjida.  
Ko'zlari alang-jalang,  
Foydadan mudir garang.  
Ish oldi deb o'ngiga  
Tish cho'tkaning o'rniga  
(Og'ib boshi-kallasi)  
O'rab sotar ammasin.  
Ko'ylak cho'tka, deb o'ylab,  
Qo'ygan xotinin pullab.

Hech bir narsani sezmas,  
U pul sanash bilan mast.  
Tirnoq cho'tka deb chaqqon,  
Sevgan bolasin sotgan.  
Kimdir o'g'lini shu on  
Olib ketgach do'kondan  
Debdi, buncha sen beg'am,  
Aqling bormi, muttaham!  
Ayt, sotayapsan kimni?..  
Sezgach u bo'lib jinni  
G'aflatga botib qopti,  
Bir umr yotib qopti...  
Ammoki shundan buyon  
Hammaga bu sir ayon!  
Tipratikon-la har choq  
Yuvishar idish-tovoq.

## **OZODAPESHA PASHSHA**

*(Yan Bjexvadan)*

Yashar edi bir pashsha,  
Doim ozodapesha.  
Yakshanbada ko'milib,  
Qulupnay murabboga,  
Yotar edi cho'milib.  
Dushanba — oromida  
Suzardi rohat qilib,  
Zo'r gilos qiyomida.  
Seshanba kuni esa,  
Pomidor sharbatida  
Yuvinish edi maza.  
Chorshanba — ming'ir-ming'ir  
Kuylab limonning taxir,  
Nordon suviga sho'ng'ir.

Payshanba — sekin yotib,  
Yo kiselda suzadi,  
Yoki saqichga botib...  
Juma kuni albatta  
Suzar sutda yo qatiq  
Yo bo'lmasa kompotda.  
Bo'yalib siyoh rangga,  
Shanba kuni, der afsus,  
Charchab toldim, attang-a!  
Tinmay cho'mildim, ammo  
Toza bo'lmadim aslo.

### O'TGAN GAP

Quldorlik davrida  
Bo'lib o'tgan bu.  
Boshqa davrlarga  
Kelib yetgan bu.  
Chol bilan kampirning  
Yolg'iz farzandi.  
Milsiz havasga  
Bo'lgandi bandi.  
Ko'zidan shashqator  
Oqardi yoshi,  
Xomush o'tirardi  
Egilib boshi.  
"Ko'z yoshing ko'rguncha,  
Qo'zim,— der ota,—  
Roziman, ko'zginam  
Teshilsa hatto.  
Nima u yig'latgan,  
Eggan boshingni?  
Sababin ayt, o'g'lim,  
Art, ko'z yoshingni".

O'g'il der: "Ot minar  
Yigit shunqori,  
Mening haligacha  
Yo'qdir tulporim.  
Otim bo'lsa edi,  
Minib chopardim,  
Qachonlar baxtimni  
Izlab topardim..."  
Otaning bo'g'ini  
Bo'shashib ketdi.  
Yuragiga olov  
Tutashib ketdi:  
"Toqatim yo'q senga  
Sanchilsa nina.  
Erta bozor borgin,  
Baxtingni sina..."  
Ota o'z bo'yniga  
Arqonni soldi,  
Qullar bozoriga  
O'g'il yo'l oldi.  
Otasini sotib  
Qaytdi ot minib.  
Shunda ham ko'z yoshi  
Qolmadi tinib.  
Ona der: "Ko'zingning  
Yoshiga boqib  
Turguncha, ko'zginam  
Tushmasmi oqib?!"  
Nima u yig'latgan,  
Eggan boshingni,  
Sababin ayt, o'g'lim,  
Art, ko'z yoshingni!"  
"Boshqalarday baxtli  
Kunim yo'q mening,

Kiyay desam, zarbof  
To'nim yo'q mening".  
Ona o'z qo'liga  
Kishanni soldi.  
Qullar bozoriga  
O'g'il yo'l oldi.  
Onasini sotib  
Kiydi zarbof to'n  
Va dedi: "Bizga ham  
Tug'ar ekan kun..."  
Odamlar qilmishin  
Qolishgach sezib,  
Do'stlari ham tezda  
Ketishdi bezib.  
Birov la'natladi,  
Birov otdi tosh.  
U qochdi, isnodga  
Berolmasdan dosh.  
Otliqlar ichiga  
Urdi o'zini.  
Noiloj niqoblab  
Oldi yuzini.  
Quldorlik davrida  
Bo'lib o'tgan bu.  
Boshqa davrlarga  
Kelib yetgan bu.  
Oti ham qarigan,  
To'ni ham to'zib,  
U hamon bezovta  
Yurganmish kezib.  
Ot mingan, to'n kiygan  
Odamlar aro,  
Tanirsiz, yo'qmikan  
U baxti qaro...

## GAP UQMAS QULOQ

Tushidami, o'ngida —  
O'ylar xayolga tolib,  
Shokarimning qulog'i  
Qolgan emish yo'qolib.  
Xafalikdan hech narsa  
Ko'rinmaydi ko'ziga.  
Kim agar topgan bo'lsa  
Qaytib bersin o'ziga.  
Qulog'imni olgan deb,  
Har kimdan qilib gumon.  
Xo'p so'rab-surishtirib,  
Yugurar u to'rt tomon.  
Hayvonot bog'idagi  
Maymunni ko'ra solib,  
Pista tashlab, qulog'in —  
Qo'ysam der emish olib.  
Maymunvoy qulog'ini  
Unga ko'z-ko'z qilarmish.  
Masxaralab, quloqsiz  
Bola deya kularmish.  
Quyvon ham qulog'ini  
Tik qilib turgan emish.  
Tulki, qunduz qulog'in  
Ding qilib turgan emish.  
Yo'lbars, Sher qulog'i  
Ekan juda ham sezgir.  
Eshitishda hammasi  
Biri-biridan tezigir.  
Nachora, Shokarimning  
Qulog'i bitib qolgan,  
Armon qilar qulog'im —  
Yo'qolib-yitib qolgan.  
Cho'kib yotgan tuyaning

Yoniga borib showvoz  
O'ylabdi, bu ajoyib  
Quloq ekan menga mos.  
Tuyaning qulog'iga  
Qo'lin cho'zgani zamon  
U bo'kirib, buribdi  
Qulog'in ko'kka tomon.  
Tuya arzin eshitib,  
Yetib kelib egasi  
Shokarimni ko'rib der:  
Bu qilig'ing nimasi?!  
U der, quloqsiz qolib  
Bo'ldim rosa ovora.  
Yordam bering, ko'rganlar  
Qilishmoqda masxara.  
Amaki Shokarimga  
Dildan yaxshilik ko'zlab,  
Qulog'ining yo'qolish  
Sababin berar so'zlab:  
Ehtimol qulog'ingni  
Darsga tikmagansan.  
Ota-onang, muallim  
So'zini uqmagansan.  
Kimki foydali gapga  
Agar solmasa quloq.  
Bilginki, bundaylarning  
O'zida ayb, gunoh.  
Gap uqmasning qulog'in  
Cho'zganda og'rir sanchib,  
Egasidan qochadi  
Bunday quloqlar ranjib...  
Kimdir shu payt chaqirar...  
(Tanishmi, do'sti edi.)  
Shokarim tezlik bilan  
Mana men, labbay dedi.

Ushlab ko'rsa qulog'i  
Joyida turgan ekan.  
U gap uqmas quloqni  
Tushida ko'rgan ekan.

### TANBALLAR OROLI

Dunyo xaritasida  
Bo'lgan ekan bir orol.  
Qushlar unda betashvish,  
Yashar ekan bermalol.  
Bag'ri mangu chamanzor,  
Yashnagan bahor ekan.  
Qish, kuz nimadir, bilmay  
Ochilib yashnar ekan.  
Orol ta'rifi qushlar —  
Sozida takror bo'lib,  
Yashnab borar kundan-kun  
Tengsiz chiroyga to'lib.  
Qushlar dunyoni kezib  
Uchratmapti bunday joy.  
Manzarasi beqiyos  
Meva-cheva, donga boy...  
Uzoq yurtga, yuksakka  
Parvoz qilish ko'p og'ir.  
Qushlar depti: Safarda  
Ezildi yurak-bag'ir.  
Shunday go'zal orolda  
Yashayapmiz, nima kam?  
Yer qolib, ko'kda doim  
Nega biz chekamiz g'am?  
Qushlar shartga muvofiq  
Shalpaytirib qanotin.  
Yeb-ichibdi, sudralib  
O'tkazibdi hayotin.

Tanbal, ishga yaroqsiz  
Bo'lib qolmish davr o'tib.  
Uchishni ham shu zayl  
Qo'yibdilar unutib.  
Qushlar juda kech turib,  
Juda erta tunabdi.  
Orolning ham boyligi,  
Ham chiroyi tugabdi.  
Kunlar o'tib qushchalar  
Bo'lishibdi donga zor.  
Uchay desa ucholmas,  
Atrofida suvlik bor...  
Hech narsaga yaroqsiz  
Bo'lib qolgan jon-tani.  
Xaritadan yo'qolmish  
Tanballarning Vatani...

### **SARDOR AFSONASI**

Balki bu bir bo'lgan gapdir,  
Balki bu bir afsona.  
Yo lofchilar aytgan lofdir,  
Yo to'qilgan hangoma.  
Men o'zimcha bu olamning  
Sirlarini sharhlayman,  
Deyolmayman, lek, odamning  
Kimligini farqlayman.  
Bu dunyoda kim bilimga,  
Kim kuchiga ishonar.  
Hiyla, makr yoqar kimga,  
Kim puch shuhrat qozonar...  
Jahongirning bo'lgan ekan  
Bir sevimli sardori.  
Teng kelolmas man-man degan  
Yer yuzining g'addori.

U kuchiga bo'lib mag'rur,  
Parvo qilmay aqlga,  
Manmanlikka beribdi zo'r,  
Mayl etibdi jahлга.  
Inson zotin nomardligi  
Oshganda-ku bir balo.  
Ammo vahshiy bedardligi —  
Boshga bitgan ajdaho.  
Mazlumlarga sardor faqat  
O'tkazarkan zulmini.  
Hamma undan chekib faryod,  
Tilarkan o'limini.  
Har safardan lashkar bilan  
Qaytar ekan qon kechib.  
Zahar sochar misli ilon,  
Umr ko'rar qon ichib.  
Jahongir ham, xizmatini  
Ado etgan sardorga,  
Debdi bir kun: Min otingni,  
Shaylan yana safarga!  
Men ham senga himmat qilib,  
Yeru davlat bergayman.  
Zo'rligingni hurmat qilib,  
Doim maqtab yurgayman.  
Minib olgin hozir, sardor,  
Sen ishongan otingga,  
Qanot bog'lab uch shiddatkor,  
Ot qamchila oldinga.  
Otda qancha uzoq borsang,  
Baxting shuncha kulgusi.  
Yer yuzini tamom olsang,  
Yarmi senga bo'lgusi.  
Sardor otga qamchi bosdi,  
Oti shamolday uchdi.

Xayolida yer ust-osti,  
Boylik ketidan tushdi.  
Kunduz chopdi, kecha chopdi,  
Chopdi sardor qurmag'ur.  
Badanidan terlar oqdi,  
Yo'l azobi ko'p og'ir.  
Ot jonivor holdan toyib  
Qumloqlarga yetgan on,  
Gurs yiqildi va munkib,  
Shu zahoti berdi jon.  
Sardor esa otni tashlab,  
Piyodalab yugurar.  
Atrofida dilni g'ashlab,  
Qum quyuni quturar.  
U sho'rlikning ikki ko'zi  
Qumga to'ldi beshafqat.  
Yuragidan chiqmay so'zi,  
Ingranar edi faqat.  
Tanasida qolmay mador,  
Sudralar u qumloqda,  
Ammo boylik hissi yonar  
Hirs qurboni — yurakda.  
Yana ko'proq yer olsam deb,  
Ichin tirnab yotdi u.  
Hozir olgan yerim kam deb,  
Qamchisini otdi u.  
Ro'parada qamchi turar,  
Qum bag'rida kekkayib.  
Endi undan kim hol so'rar,  
Dunyo ishi g'aroyib...  
Qamchisiga yetolmasdan  
Yer siypalab toldi u.  
So'ng boshini ko'tarmasdan,  
Qumni tishlab qoldi u.

## RAHMIDIL BOLALAR

Uy yonida bitta it  
Bolaladi qish chog'i.  
Kuchukchalar g'ingshiydi  
Aslo tinmasdan jag'i.  
Jajjilarga to'rt-besh kun  
Bo'ldi ermak, tomosha.  
Asrash uchun sovuqdan  
Chora izlashdi rosa.  
Atrofida parvona  
O'zlarini unutib,  
Sezmay qolar tanlardan  
Sovuq ketganin o'tib.  
Mitti itlar holiga  
Ich-ichidan achinib,  
Onasining daragi  
Yo'qligidan g'ijinib,  
Kuchuklarning har birin  
Uyga olib kirishar.  
Ota-ona: "Bu ne gap  
Deya tergab, urishar.  
Yashasaydik hovlida  
Asrash oson bo'lardi.  
Bo'sag'ada doim u  
Sodiq posbon bo'lardi.  
Bir kamimiz, it bilan  
Qo'shilishib yotishmi?  
Uyda havo buzilib,  
Sassiq hidga botishmi?"  
Ega chiqmay bittasi  
Qolgan edi dalada.  
Tinchlik bermas taqdiri  
Uning har bir bolaga.  
Yotishadi bezovta

To'shagida to'lg'onib.  
Noxush tushlar ko'rishib  
Ketishadi uyg'onib.  
Ertalabdan chopishar  
Sut, saryog', non olib.  
It mo'ltirar, bolalar  
Mehrlarin tan olib.  
G'azablanar bir ona  
Toshih yurakda dardi:  
"Norasta it ahvoli  
Bag'rim ezib yubordi.  
Do'mboqqina kuchukni  
Tashlab ketgan onasi,  
Urmay qolmas hayvonga  
Kasofati-qorasi..."  
Ming azobda jaji it  
Ko'zi necha yoshlandi.  
Yaxshiyamki, baxtiga  
Iliq bahor boshlandi.  
Eshitilib qoladi  
Hamon nolih hurishi.  
Rahm uyg'otar yurakda  
Uning daydib yurishi.

### **SIRLI XUMLAR**

Tuproq hamon sir saqlar.  
Kun botaru tong otar,  
Bir xumchanning ichida  
Devlar yashirinib yotar.

G'orlar hamon sir saqlar:  
Sirli o'ra ichida —  
Sopol, naqshin xumchada  
Jinlar bazmi avjida.

O'sha dahshatli xumni  
Qaroqchilar izlashar.  
O'g'rilar topolmay  
Qora tunda bo'zlashar.

Ayting nima bo'ladi  
Devlar chiqsa ochiqqa?  
Ayting nima bo'ladi  
Jinlar chiqsa ochiqqa?

Buni oson hal qilar  
Kitob o'qigan bola,  
Xumdagi oltinlarni  
Bir kuni topib olar.

Bu bolaning ilmidan  
Jin, devlar qochib ketar.  
Ona xalqning boshiga  
Tillalar sohib ketar.

